

# OMUKWETU

Registered at the General Post Office as a Newspaper

## OTATU IGAMENE NGIINI KOSHIPONGA SHOMULILO?

Shika osho epulo edhigu mokukala kwetu nkoka omumvo kehe tatu thikamene omagumbo taga ongotele momulilo manga twa tala ko nomaako gi ihukata. Osho sha ningwa wo nomasiku ga zi ko puushiinda waNiipa. Nosha yela kutya osho sha ningwa nuumvo pomahala ogendji mOwambo.

Kuku ta monika mefano ta kondjo okwa li gumwe gwomaantu ye vule 500 poshiponga shomulilo megumbo lyomusamane Filipus Auene. Nando mekondjo lyegumbo ndyoka enene inamu hupithwa sha shomizalo nenge iipalutha, oomwenyo dhaakulupe yaali megumbo ndyoka odha li dha hupithwa.

Otatu ihupitha ngiini koshiponga shomulilo momagumbo getu gOshiwambo? Ngiika onkambadhala yotango otu tonatele aluhe omulilo ogu li ngiini pomasiga. Otu tonatele uupalwa otau adhika ngiini kuunona.

Pamwe tatu vulu wo okulundulula oompungulo dhiinima ya simana ngaashi iigandhi niiketha tu yi tule mepingathano lyombepo nge tayi pepe yaa adhike nuupu komulilo. Oonkambadhala ndhika otatu dhi ningi pamwe negalikano enene lyongerki:

"Tu gamena koshiponga shomulilo."

## OMUMBISOFI A GALUKA KUAMERIKA

Omumbisofi gwongerki, Dr. Leonard Auala, okwa galukile ishewe kegumbo konima yetalelopo lye kuAmerika konyala uule woomwedhi mbali, a kola natango nokwa ndjanga.

Hwiya omumbisofi nando ina enda ehalakehe moshilongo, okwa ti okwa talela pomahala ogendji ga simana nokwa kala moonkundathana naawiliki yepangelo lyaAmerika ndyoka lye mu ithanene.

Molweendo nduka omumbisofi okwa dhiambulula unene eenditho lyaKalunga miinima oyindji omolwomagalikaneno gooitaali. Okwa holola wo nkene a mono uudhigu wokuuvitha ko aantu nge ta tumbula a za kuSuidwes: Namibia olyo alike lya tseyika hwiya.

Mokugaluka kwe omumbisofi okwa pitile wo kulngilanda pahyo lyepangelo ndiyaka. likundathanwa yawo oyo iiholekwa natango.



Kuku Maria Nambahu okwa li ta kondjo shili nando itavulu. liti mbyoka ta kookolola oyo ya ningi eshigo lyombepo yaanegumbo ndyoka ngashingeyi.

## Euvathano nenge ondhalate natango?

Kashi shi aluhe oshipu ku ningwe euvathano lyaangoka itaamu kundathana kokana nokana. Ihe unene tuu kashi shi oshipu u ningilwe kugulwe euvathano ngoka kee uvite ko oompumbwe dhoye nenge he dhi idhimbike.

Oonkambadhala dhOmapangelo gatau; Epangelo lya S.A., lyOwambo nolyaKavango, sho ga li ga tsakanene kOshaanda muJanuali 1972 okutunga euvathano pokati kaagandji yiilonga naataambi yiilonga, odha palutha, oshoka aagandji yiilonga ayeke ya li ya etwa po pookundathana. Aalongeli inaa pitikilwa po.

Opo mpaka pwa za omudhi gumwe guululu tau etitha natango omayemato mokati kaaniilonga. Tashi ti, ewi lyoshigwana nolyaaniilonga inali pulakenwa ngaashi lya uvikile miinima tayi landula mpaka:

a) Omukalo gwendhalate gu se thiluthilu nopeha lyagwo pu valwe omikalo ndhika; omulongeli a hogolole ye mwene iilonga mbyoka a hala pawino we. Nepangelo li itule mo okuputudhila aantu iilonga yi ili nanyi ili.

b) Omulongeli a kale nemanguluko lyokweetha po iilonga inee yi panda pwaa na egeelo lyoveta.

c) Omulongeli a kale nuuthemba wokutalelwapo kaanegumbo lye siku sha pumbiwa nenge ye mwene e ya talele po pomathimbo nomathimbo.

d) Omulongeli a pewe ondjambi tayi nyanyudha shi thike piilonga ye, opo a vule okugwanitha oompumbwe dhe ngaashi ikulya, omalweendo, nenge ehala lye nohakutala oshipa nenge olwaala.

e) Pomahala agehe muSuidwes mu dhikwe oombelewa dhiilonga moka aagandji yiilonga taa tsakanene naakongi yiilonga, noombelewa dha tya ngaaka dhi kale itaadhi futwa nando iimaliwa kaalongelwa.

f) Omulongeli kehe a pewe okakalata moka tamu holokele omutse gwe, edhina lye, uukwashilongo we, onomola ye nosho tuu, opuwo, haamoka mwa nyolwa ehistolli lye (nie bewysboek nie).

Omaindilo ngaka oga zile mokomitiye yokudhiladhila ombili mokati kaaniilonga. Ngele kagu uvitike esimano lyago, nena ethimbo onali ke ya uuna taga ka yuulukiwa koongundu adhihe mbali.

## “Oonkundathana tadhi mangulula omwenyo”

Lya nyolwa kuFestus Ashipala

Embo ndika lyomapandja 80, otali longo nokupukulula moshilonga shokuhunga omwenyo mOngerki. Omunyoli ota ti kutya, nonando ehungomwenyo mokati kaakwanegongalo otali ningwa nomauvitho, melongo lyoohapu dhaKalunga nenge momalelogongalo, okukalathana kwesiku kehe kwomukriste nomukriste omukwawo, otaku vulu wo ku ninge ompito yokuhungathana.

Omunyoli okwa topola ehungomwenyo paali; uuna tali ningwa mongundu nuuna ndoka tali ningwa omolwomuntu gumwe. Ndika lyahugunina okwe li koleke kutya olyo edhigu noonkondo.

Megongalo omuhungimwenyo keeshi omusita awike, ihe omukriste kehe ngoka e na uundjolowele muukriste we.

### Ehungomwenyo oshike?

Epulo ndika okwe li yamukula membo ndika kutya, ehungomwenyo okukwatha ngoka a kanitha ekwatathano naKalunga ke nosho wo nomuntu omukwawo. Omuhungwa oye omuvu a nyengwa okwiikwatha nokwa pumbwa gulwe te mu yambidhidha.

Omunyoli nando ina ya muule womatopagulo guukwatya woomwenyo dhaantu ngashi elongo lyontseyomwenyo alihe tali shi popile kutya omuntu kehe oku na uukwatya we wa yooloka kowamukwawo, mpaka opwa gandjwa efano ewanawa ndyoka tali kwatha omuyakuli kehe moshilonga shehungomwenyo.

Embo ndika, ngashi sha holoka nomoshi-


palanyolo shalyo, kutya olyokumangulula, itali mangulula ashike omadhiladhilo gaanashilonga mboka ya longo oshilonga shika nomausama nenge nomatumpakanitho, ihe otali mangulula wo oomwenyo dhaayakulwa moondjigilile dhomikalo dheimatulo lyomwenyo dha longithwa sigo oompaka mongerki yetu.

### Omolwashike ku hungwe oomwenyo?

Omunyoli nomoshinima shika okwa gandja uyelele wa gwana. Eputudho lyomegumbo nomudhingoloko aguhe omuntu ta kokele mo, oyo mbika pakudhiladhila kwe tayi vala ompumbwe yehungomwenyo, oshoka olwindji inayi tonatelwa nkene tayi ende.

Ihe ina dhimbwa wo okutumbula epunduko kehe lyokugwila moondjo tadhi kala dhaholekwa sigo dha vala uuvu itaa aludhwa we nuupu.

Ndika embo lyotango lya holoka melaka lyOshiwambo, ngele tali ilongwa komuntu kehe, ta ka gamena onkalathano ye yi kale muukolele sigo okomapiipi taga ka landula. **Oli li mOstola yOmambo, Oniipa. Otali gu oosenda 65c.** Eino Amaambo



# Evululuko lyetu konima yepangulo

## OSOONDAHA ONTI-16 YA LANDULA UUKWATATU

"Omeehamo guuyuni wongashingeyi kage shi okuyelekwa neadhimo ndyoka tali ka holokela mutse. Oshoka nokuyululuka shili, iishitwa oya tegelela eholoko lyana yaKalunga....." Rom. 8: 18-25.

Aanona oyendji oya lukwa ooKaunapawa. Osho evitho lyomuule lya tompele aasamane oyendji kutya, uuyuni nowetu kau na mpoka omuntu to ti wa vululukwa. Osho wo Omuyapostoli Paulus ta tumbula mpaka.

Ihe omadhiladhilo gaPaulus otage tu thindikile sigo oketegameno ndyoka tali pumbiwa komukuuyuni kehe sho ta ti: Uuwehame mbuka owokathimbo okafupi kowala, nkoka konima yako ku na embwengelela lyethimbo lyevululuko Ov. 18.

Okukala muuyuni weyonuko, uunkundi wolutu, omahindo guulunde, uutondwe wuuyuni, uugeyi womutondi gwetu satana, iinima mbika ayihe otayi tu ehameke nayi. Etegameno otu li na ashike komeho, 2Kor. 4: 17; Mat. 5:12. Ehulilo lyomalutu geshunduko. Fil. 3:21 Tatu pewa uuthiga womegulu. 1Petr. 1:4-5 Twa faathana nOmukulili 1Joh. 3:2 Otwa ya haandiyaka yomaudhigu nomaupyakadhi.

Ov. 19- lishitwa niinamwenyo ayihe Kalunga e yi shiti, kayi na oondunge ngaashi aantu naayengeli ye dhi na. Mbika Paulus ote yi tala nayo wo oya tegelela eadhimo ndyoka tali ka holokela aana yaKalunga Jesus nge te ya okupangula.

Oyo wo Kalunga okwe yi gandja meyonuko omolweyono lyomuntu. 1Mos. 3:17-19. Eyonuko lyayo oli li mpoka sho itayi tana, ombepo, uotalala, epupyu, eyelu noshikukuta otayi yi hepeke. Aantu otaye yi dhipaga nesiku kwaa na ompumbwe, yo yene wo otayi lyaathana nokuhepekathana. Shika otashika hula po, Kalunga nge ta shitukitha ayihe iipe. Ehol. 21: 1-5.

Paulus ita ti kutya, iishitwa otayi ka yelithwa ngaashi aantu taa ka adhimithwa, aawe. Ov. 22. Ye ita ti wo kutya, iinamwenyo niimeno yongashingeyi otayi ka anduka muuyuni uupe. Omuyapostoli ota popi owa la emanguluko muupika weyonuko.

Ehupitho neadhimo oyo oshipewa shaamboka ya pewa omagano goMbepo Ondjapuki ndjoka inaayi pewa nando oshinamwenyo shimweshimwe. Kutya otwa valwa ku-



## OWA LI KO TUU?

Ovanyasha voshitaingerki shaUkwanyama ova li va ongala moshongalele Isha vo shoshitaingerki mOkalongo eti-30,6-2,7,72. Elalakano ola li okutwaafana omukumo nondjovo yaKalunga, ngaashi va li va konakona "OMAPENDA OMEITA-VELO" pa Hebr, 11:4.

Oipopwa i lili noi lili yopamhepo oya li ya etwa po moshongalele eshi noye tu twa omukumo. Osho yo oipopwa oyo tai popi onghalafano yetu yopalutu ya li ye tu kumike monghalafano yetu.

Moshongalele eshi otwa li twa mona ovaenda ovo twa kala pamwe navo moshongalele va dja keembinga di lili nodi lili ngaashi kOdibo (Anglikan) kOnamutayi (Anglikan) osho yo ovaenda va dja kOitaingerki ngaashi kOndonga nOuninginino.

Omaimbilo nomahokololo oyo ya li eengedjo dokwiifana nodokushitifa oshongalele. Mokwiimba nokukondjela ekopi loshingoli, Ovakalongo ovo va li tava ti pii: Eshi ove tu lombwela kutya:

"Ke mo muka, ke mo muka, ke mo okwa nyumuka."

Moku tu hololela oshili ei ove lilikolele ekopi loshingoli.

Ovanyasha ova li yo va nyamukula epulo eli, Olyelye handi mu tumu?" Ovakalongo ovo va li votete eshi ve tu umba okabistoli keeholo 206. Hano omaongalo oo a findana notaa pandulwa ngaashi taa shikula apa.



## EPANDULO ENENE

Amwameme mu C.D.M. otatu mu pandula unene sho mwe tu kwatha ekwatho enene omolwetungo lyongerki yetu. Omwaalu gwo-R26,38 otwe gu taa mba nomwenyo aguhe.

Tate Simon Nafuka natate Shipanga, otwe mu pandula unene sho mwa thindikile iimaliwa mbika. Tate Festus Teodor okwe yi thikitha ayihe. Egongalo alihe lyaLukonda otali mu halele o-mayambeko gaKalunga noitali mu dhibwa nando. Ps. 103: 1-3.

Peha Iyegongalo  
Rev. Johannes Gweendama

Okalongo.....	R 206.60	oilya inai valulwa manga.
Ongenga.....	R 113.30	
Ohalushu.....	R 108.40	
Olupandu.....	R 91.00	
Engela.....	R 87.00	
Okatope.....	R 82.00	
Ongwediva.....	R 82.00	
Edundja.....	R 78.00	
Ondobe.....	R 75.00	
Eenhana.....	R 72.00	
Engela Hospitaal.....	R 30.00	
Ovaenda kOnamutayi.....	R 1.00	

Apa otapu shikula omaongalo oo a wanifa eufo notaa pandulwa yo.

Endola.....R 70.00 Noikutu.

Omaongalo oo inaa wanifa eufo notaa talika e na eengunga ngaashi taa shikula apa.

Kongo.....R 57.00 Ongunga.....R 13.00

Omundaungilo.....R 17.85 Ongunga.....R 63.25

Eemhumbwe nedidiliko.....R 181.95

Ongalo yoshoongalele.....R 34.55

Aishe kumwe oya li po R1,456.80

Ovafindani votete ova li ngaho va pandulwa nokupewa Ombibeli ipe, ovativali va pewa Etestamendi Lipe.

Kalunga na yambeke aveshe ovo va li ve lipyakidila okwoongelela oshilonga shaKalunga oiyakulifo, opo va kale inava pumbwa sha.

"Tu longeleni Omwene manga tu li mounyuni ou"

A. Mungungu

# Etongoko loughaku momaumbo nopeengulu

Petameko onda hala okuhokolola kombi-nga youhaku womomaumbo. Onawa eshi ouhaku womomaumbo inau diminwa, oshe-shi inau fimana nande. Etongoko pokati kouhaku womeumbo naau womoshipangelo otali monika ngaashi tashi landula apa:

## Oimbodi

Ouhaku womeumbo ohau longwa pamikalo edi: Okuxupila nokunwefa nokunyami-na oimbodi. Okunwefa eta, okuxupila nosho tuu noimbodi oko oshiponga sha kula.

Otwa koneka naanaa nokutya oomeme ngeenge tava yandje oimbodi kovanaudu vavo, ihava tale nande ondjele yoimbodi, ayee. Osho yo ihava yeleke nande omufika wauu ta pewa oimbodi, aaye, ohava mbwangula ashike oimbodi iyadi oshikangwa, komanaudu waye.

Opo nee ngeenge inashi kwafa sha natango, ta kufa oimbodi imwe ile ominghafi dimwe di lili nota twikile okuhakula omunaudu waye. Osho ngaha ta kala nokulundulula oimbodi yomanaudu waye, e shii ote mu kwafa, nani oshiponga ashike te mu etele.

Onawa ngeenge to pwilikine nawa nghe oimbodi hai longo momalutu ovanhu. Oudiyo ou woimbodi ngeenge tau i molutu lomunhu, ohonde yaye otai yada oudiyo. Oudiyo ou ngeenge wa yada olutu, nena oilyo imwe yolutu otai tameke okunyonauka notai hovele okukanifa eenghono dokulonga oilonga yayo, unene tuu eefiyo.

Eefiyo tadi nyengwa okudinda omaxu, nomunhu ta kwatwa koutu oo tau ifanwa (Albumin). Oudiyo ngeenge wa yada mohonde ohonde otai lidindi, nomeva taa ongala

peenhele dimwe, ngaashi keemhadi, komaulu nomedimo. Omeva ngeenge taa kala keemhadi nokomaulu, omunhu ta kala a fa a dinda. Omeva ngeenge taa ongala medimo omunhu ta kala e na edimo lakula, nge omulumenhu ile omukainhu, nomunhu a tya ngaha ohaku tiwa oku na oufimba waKalunga. Omunhu a tya ngaha ngeenge te uya moshipangelo ta pula efimbo lile okuveluka.

Efiku limwe omunhu e na ashike okufya nokuli. Oudu ou woufimba waKalunga ihau etwa ashike koimbodi, ayee, ndelene ohau etwa yo komaudu makwao, ngaashi oudu wexuli, noudu womutima nosho tuu. Omaidiliko amwe oo haa monika oo aa: Omesho, omayoo, nolutu talu ningi olushunga.

## Exupilo

Endjadja olo olipu, na ohali longo ngaashi ekenya omandjadja ngeenge taa ikilile okuxupilwa, otaa kanifa eenghono taa pape naitaa longo vali mangha inaa xupilwa. Ounona vamwe ovo ihava i vali koixwa mangha inava xupilwa. Oiponga ikwao oi li yo popepi nounona va tya ngaha.

## Eemhindo nomaluungu

Oixupilifo nayo otai etele ovanhu oshiponga. Luhapu oinima ya tja ngaha inaf yelekana nande nande. Mokuxupila omaluungu neemhindo da twa omandjadja fiyo a ninga oipute nokuli. Eembuto domaudu opo nee odi na omhito okupitila moipute oyo i li momandjadja no tadi i molutu.

Omandjadja taa tambula yo diva oudiyo woimbodi omolu oipute. Opo nee ombuto (infesie) tai tandavele nomandjadja aeshe. Omandjadja taa vele fiku limwe taa olo

nokuli, ile taa mbutu. Omunhu a tya ngaha ngeenge ina ya koshihakulilo diva otashi dulika ta fi divadiva.

## Ouhaku womoshihakulilo

Fye ohatu fimaneke ouhaku woshihakulilo, noha tu u lineekele u dule oo womeumbo. Ouhaku womoshipangelo oo okunwa omiiti, novenda, okuvaeka n.sh.t.

Moipangelo omu na omiiti dihapu, omaludi e lili noku lili, meengudu dihapu. Ngaashi naanaa omaudu ta yooloka nomahapu, osho omiiti yo tadi yooloka nodi li po dihapu. Omaudu mahapu oku na omiiti odo tadi yu-kiilile okuhakula oudu oo.

Omiiti oda longwa nawa, da didwa, da haulwa noda tukulwa meengudu. Omiiti odi na ondjele nohadi longifwa nokutya otadi pu okunuwa ile okulongifwa momafiku e fike peni. Momiti kamu na eembakiteli doudu washu. Omiiti ohadi pungulwa momakende mayela noda tuvikilwamo nawa.

Omakende omiiti eli meeshikopa noha di filwa oshisho, opo eendwi, nomakako aha mone omhito yokukwata omiiti. Ouhaku womoshihakulilo oo ouhaku oo u na elandulafano layela. Omaudu moshihakulilo ohaa hakulwa pamikalo dihapu. Otu na paife omaudu a 8 mOwambo, oo haa dulu okukeelwa momunhu, ngaashi taa landula apa.

Oudu woshikayikayi, - wa Aa, (Difterie) -TB.- Oshikolocha, oudu wombada=(Polio) Oshidu shitwima, (Geelkools) noudu wa cholera.

Endelela u kongele okaana koye eevenda edi, osheshi ngeenge taka vendwa, otaka kala ka tunhilwa, naitaka vele vali omaudu oo, ndele ngeenge we ka vendifa pashikulafano olo to ka lombwelwa komuhakuli woye. Ouhaku ou ohau ifanwa "voorkomingbehandeling" =(elitetukokwafo).

Okuhakula nomiti, ope na omaudu oo ihau dulu okukeelwa. Omunhu ota hakulwa ashike ngeenge a kwatwa koutu. Ouhaku ou ohau ifanwa "Mediesebehandeling." Ope na natango ouhaku oo hau ifanwa ouhaku wa wapala. Ouhaku ou wa fimana unene nomoipangelo, oo omunhu ta dulu yo oku u longifa meumbo laye, ongekwafo lotete, opo omunaudu waye a dule okufika koshihakulilo nombili. Apa otapa landula omauhaku amwe nghee omunhu e na okukwafa omunaudu waye meumbo:

## Ombato

Nwa omeva mahapu luhapu mefiku. Lya oiimati aishe: omadamate, omakwaava, omapapaye, omaapula, eembe, eenyandi, omauni, omapwaka, nosho tuu oiimati aishe. Ngee oyokongolo ile oyOshiwambo, oya fimana unene. Lya oipeta yoiimati oyo hai dulu okuliwa ngaashi omadamate eembe n.sh.t. Lya vali ombidi pefimbo layo. Osho yo onghundu. Moinima aishe ei otamu monika "Sellulose" oyo hai longifa nawa edimo.

FIYO OPAPA EPANGO LA YELA OHATU LI HANGE ASHIKE MOSHIHAKULILO, NDELENE OMUKALO MUWA WOKULIAMENA KOMAUDU OHATU SHI NINGI MOMAUMBO ETU.



# Natango onkalo yiilonga yaayunguli oyi li momayipulo

OMATOKOLO OMAPE GA THIKWA MUGO

Oonkatu ne dha simana dha ziminwa komapangelo gatatu; Epangelo lyOwambo, IyaKavango nolya S.A. otadhi ka kandula po omaudhigu agehe ge na sha nonkalo yaaniilonga, pashifo shEpangelo "Die Suidwester," 17.8.1972.

Pashifo shika, omuunguli kehe ota ka pewa, okakalata komutse gwe; nomutaambi gwiilonga ngele okwi iyaka po piilonga ye, omuhona gwe otaka futwa kEpangelo ndyoka kwa za omulongeli ngoka; oonkatu dhokugeela othondolo ndjoka ya thiga po iilonga otadhi etwa po wo nomulongelwa ota ka pewa uuthemba opo a lopote koveta uu-

## Kalunga na pandulwe

**Jonas Nengola, Tsumeb,** ota nyola kutya: "Naku ningwe shili omalikano nomaliikano omolwovanhu aveshe, unene tuu ava tu li mehalakano nge tu li mOwambo ile mOushimba, osheshi Jesus ta ti:" Efimbo ngeenge tali fiki, omashindo noulunde otalu lundu nohole yavahapu otai xuxwa". 1Tim.2: 1-2

### Helena Amunyela


Tate Jonas okwa kundila po yo omunyasha Helena Amunyela, Oniimwandi, ou a tunga eumbo laye ta ti: "Omolwoshivilo shoye shohango, ohatu ti Kalunga na hambelelwe ngaashi wa ti: (Tala Omukwetu No.11, 1972 epandja 5).

Ndelene dimbulukwa yo kutya, apa tapa hambelelwa Kalunga, opo yo omutondi ta dingilile. Ouyelele nau pangele eumbo leni". Rom.12:9-12

### Makundo gange

One vadinkantu wongereka zaElok, ame ntumi zeni kepya IyaKavango ku na ku mu tumina makundo asi: Damekeni noku lingava muntu mudima rutu nomwenyo kwaHompa gweni. Mpandu hena kweni eyi mu na tambura nge ni kare mefirosinka lyeni. Kol.1:9. Hompa amu tungike, ga tu ka limone.

Mudiakoni Naftali Lihongo



Omudiakoni Naftali Lihongo

na omulongeli gwe itee mu nyanyudha miilonga ye.

Omaudhigu gaaniilonga oga li ga kundathana komapangelo ga tumbulwa metetekelo petameko lyomumvo nguka muGrootfontein, konima yoshipotha oshinene shaaniilonga muSuidwes. Omauvathano ngoka ga li ga ningwa po, inaga tsakanithwa nenge inaga kwatha sha.

MuAguste nuumvo oshigongi shaatiligane osha li sha gongala mOvenduka moka oministeli yomaudhano, Dr. P. G.J. Koornhof a ti kutya:



Omusamane Efraim okwa hala okukwatha nokuhupitha sha megumbo ndika tali pi, ita vulu sha. Okwa thikama owala nonkumwe onene. Osho aantu oyendji ya li ya thikamena oshikumithalonga shika.

## Omautho gaataambi yiilonga ngoka ge na okulandulwa

Epulo limwe Iya kala edhigu muSuidwes olo okumona omukalo omwaana- wa okutaambela aakongi yiilonga miilonga, unene mboka taa zi momavigumbo. Meuvathano epe Iya ningwa pokati kEpangelo Iya S.A. nomavigumbo gaali; Epangelo lyOwambo naKavango nuumvo mOshaanda (Grootfontein) okwa thikwa sigo ompaka kutya:

### Ombelwa yokugandja iilonga

Ombelwa yokugandja iilonga otayi longo pankondo dhomautho goshitokolitho No. 83. 1972. Omautho ngoka oge na okugwanithwa naanaa, ihe itaga kwatelele mo Ombasitela nenge Omunama ngoka ta kongo iilonga. Aaluudhe yalwe aalumentu naakiintu otaa iutha komautho ngoka.

Okuza 1955, okwa kala omautho ga faathana gokutaamba aakongi yiilonga, ihe aakiintu kaya li ya yalulilwa moshinima shoka.

### Aaluudhe ya taambwa nale miilonga

Kehe omulongelwa a kuta aantu miilonga ye, oku na oku ya ndhindhilikitha kombelewa yiilonga, aalumentu nenge aakiintu. Unene ngele ou na Omuwambo nenge Omukavango, nena omulongelwa u na okuholoka mwene kombelewa yiilonga-nokuu-

Euvathano Iya ningilwe kOshaanda (Grootfontein) olya enda nawa, tashi monika mdhiko lyoombelewa dhiilonga miitopolwa yoshilongo ashihe, ihe uulunde waaniilonga haa thigi po iilonga ya ye muuthondolo, oonkatu dhi na oshilonga odha ningwa, nEpangelo lyOwambo olya zimina omautho ngaka okufuta omulongelwa ngoka a thigwa po owala kOmuwambo.

Omukalo gwokukala moodolopa pwaa na eziminino lyoveta, shika otashi tsikile natango, ihe oveta oya gandjwa nale moshinima shika okutidha po aantu ya tya ngaaka melongelokumwe IyaKomufala nenge mangestrata kumwe naopolisi.

Omusamane Koornhof okwa ti natango kutya, shika oonkatu otadhi ningwa po ishewe, opo ku ningwe ehanganu ndyoka Aawambo kulyo taa indile uukalata womitse dhawo. Shika otashi ningwa mOwambo nenge muSuidwes alihe.

dhitha oombapila dha pumbiwa. Omihoko dhilwe otashi vulika shi ningwe nando nekwatho lyongodhi (telefoon).

Mekwatathano netaambo lyOmuwambo nenge Omukavango, otapu ningwa lela euvathano Iya nyolwa naampoka okakalata komutse taka gandjwa notaka holola uukwashiwana.

Kombelewa omulongelwa ota pumbiwa ko ishewe ye mwene uuna a hala okuningila omulongeli gwe egumbo li ikalela. Oombapila dhomaudhitho omolwomutaambi gwiilonga kehe, odhi na okudhigininwa nawa dhaa mone oshiponga sha sha.

Uuna omulongelwa a tidha omuntu miilonga, nenge omulongeli a thigi po iilonga ye mwene, esiku olo tuu ndyoka oombapila dhoofooloma dhiilonga otadhi udhithwa nokutumwa kombelewa yiilonga. Onkee omwedhi kehe manga eti-7 lyomwedhi inaali thika, Tala kep. 6

## Euvathano lyiilonga...

Dha za kep. 5

oofooloma ndhoka otadhi ulikwa kombelewa yiilonga kutya omuntu, Omunama nenge omuhoko gulwe, omo e li natango miilonga mbyoka. Onomola yesiku ombapila ya shainwa omo yi li nale mombelewa notayi tsu kumwe naandjoka tayi ulikwa.

### Okutaambela miilonga

Omahala agehe ga pumbwa aantu otaga tseyithwa kombelewa yiilonga, nomaindilo agehe gaakongi yiilonga otaga thiki wo moka. Omukongi kehe gwiilonga e na okwiilopota kombelewa yiilonga momasiku gatatu sho a zi miilonga yomulongelwa gwontumba. Ombelewa otayi mu tseyithile omahala ge li po ga pumbwa aalongi, ihe ye ota gandja wo kutya, okwa tseyi iilonga yashike. Opo ngele okwa panda po iilonga yontumba, ota pewa ihe u udhithe ombapila ndjoka tayi ka ya kumwene gwiilonga mbyoka.

Ihe kombinga yOmuwambo nOmukavango, omulumentu nenge omukiintu, ita ziminwa a konge iilonga ye mwene. Ombapila ndjoka ta pewa oyi na oku mu ukitha naanaa komulongelwa gwongandi e shiwiki nale. Omulongelwa ngoka ngele ite mu taamba oku na oku mu shuna natango kombelewa yiilonga a ndhindhilika momapila. Ngele sha ningwa kutya, omukongi gwiilonga okwe ya ashike kee na ombapila, omulongelwa okwa londodhwa a dhengele ongodhi mbala kombelewa yiilonga.

Omunama nenge Ombasitela ota vulu okwiinyolitha kombelewa yiilonga ongomukongi gwiilonga kuye mwene, omukiintu nenge omulumentu. Omulongelwa wo ngoka te ke mu taamba, ota vulu okuuvathana nombelewa yiilonga ethimbo kehe a hala.

Okangundu koshilongatumo mewiliko lyomunangeshefa Silas Kweyo pethimbo lyetalelopo lyako kuGrootfontein. Omusamane Kweyo aluhe oha talelopo omagongalo gi ili nogi ili mOwambo nomUushimba nokangundu ka tya ngaaka. Euvitho lyawo oli li mepandela lyawo. **Jesus Kristus oye Ondjila, Oshili nOmwenyo (J.K.O.O.)**



## Omagumbo gaaniilonga

Omuntu kehe omuniilonga e na okukala e na onzapo tayi mu popile kuMuni okukala pehala ndyoka. Egumbo lyomuntu gumwe mohofa yomulongelwa otali vulu wo okuziminwa pauvathano ewanawa. Ihe ngoka ina pewa

eziminino ehala nando opo li li kee na okulala mo. Ihe oshinima shika kombinga yaamboka ya za momavigumbo otashi kundathanwa tango koshikondo shiinima yaaluudhe.

### Okukonga aalongi komavigumbo

Kape na oshilumbu sha pitikwa okufala omuluudhe mondoolopa ngele inashi kundathanwa tango. Ngoka a hala aalongi taa zi kOwambo nenge koKavango, na inyolithe tango kombelewa yiilonga oko a pewe eziminino. Ihe nando ongeyi, ombelewa yo yene oyo ngaa ya tegelelwa yi ku konge omuntu.

Mpoka omulongelwa te shi zimininwa a kuthe aalongi komahala ga tumbulwa pombanda, nena e na okulandula iinima mbi:

a) A kale e na egumbo lya pumbiwa noku na onzapo yokweenditha aantu ngaashi a hala.

b) A udhithe oofooloma dhopatatu omulwomulongi kehe gumwe ta kala naye. Oo-

fooloma ndhika ote dhi pewa kombelewa yaKomufala nenge kombelewa yiilonga.

c) Kombelewa yiilonga moshitopolwa shoka ta kutha aantu, KOwambo nge koKavango, ota tumine ko elandulathano lyomadhina agehe gaantu mboka e ya na.

d) Ombapila yomadhina otayi ende pamwe nomwaalu gwiimaliwa ya futwa (6.00, ngele otaa ka longa kofaalama, R 8.40 ngele otaa ka longa modoolopa) omolwaantu mboka. Omiyalu odha etwa kiinima mbika:


Omunafaalama		yalwe
1. Epangelo lya futwa	R 2. 60	R 2. 60
2. Molwomiti	70	70
3. Okakalata komutse	40	40
4. Opaasa yomombesa	1. 20	3. 60
5. Molwiikulya	1. 10	1. 10
	<b>R 6. 00</b>	<b>R 8. 40</b>

### Oofuto dhilwe

Nale omautho oga li ngeyi kutya, omulongelwa ta futu omwedhi kehe 20c omolwo-kwiinyolitha kwomukongi gwiilonga kehe gwomevi ndiyaka, nenge 50c kOmuwambo nOmukavango. Ngashingeyi 50c otadhi futwa ashike ngele ou na omulongeli omukiintu Omuwambo.

Yalwe mboka taa ikongele iilonga yawo memanguluko, otaa futu iimaliwa mbyoka yo yene, ihe yi na okuthika mombelewa yiilonga manga eti-7 lyomwedhi inali pita.

Ombelewa yokugandja iilonga kAanama oshinima tashi pulandwa manga.



Mefano ndika kolumoho oto mono omitse dhaakwanengalo lyaShaanda taa pulakene oondjimbo nomahokololo taga zi momilungu dhokangundu koshilongatumo mewiliko lyatate Silas Kweyo.

## Natango Aawambo otatu mono iihuna

Omuunguli S.N. Amagulu, kOmbaye, ota nyola omo lweuvathano epe ta ti: Aakuluntu yOwambo kayu uvite ko natango shili kutya ongiini. Otaa tokola ashike amatokolo gaa na owino, oshoka ngaashi ondhalate ndji ya ti oya teka sho ya shaina ombapila mOshaanda (Grootfontein), ondu uvite natango kashi ivule, oshoka tse hasho twa hala shika.

Tse Aawambo natango otatu mono iihuna ngaashi nale. Kombinga yoomwedhi nehala lyokulala itandi popi ko manga, ihe kombinga tuu yiimaliwa, omuntu ota mono ashike 8c motundi.

Opwe etwa aniwa omukalo kutya, omuntu oti ifutile ye mwene ngele te ya kiilonga. Eeno, oshu uka, oshoka ombesa noma shina kayi shi yandje. Ihe nando ongaaka, iimaliwa mbi hatu futu oyindji, oshoka ando okuza kOndangwa R2.70 nokuza mOshome-

ya sigo kOmbaye (Walvisbaai) R6.41. Ihe tse ohatu futu shi vule po. Omolwashike ishewe ngele nde ya kiilonga kehe omwedhi, ondi na okukuthwa R 11.70 nenge yi vule po? Anuwa otatu futu mpaka tatu lala njikulya nōmeya omulongelwa kehe oku na okukutha ko iimaliwa a fute kuMuni aniwa iikulya, nando iikulya hayo nando.

Omulongelwa oha fundjwa ihe ngaaka, oshoka ye mwene mekulo iha yi mo naantu oyendji ihatu li iikulya mbyoka, oshoka iwinayi.

Aaherero nAdamara ohaa futu ashike R 2.50 komwedhi, onkee ano tse iikulya otwa hala okwiilandela tse yene. Inatu hala uumaliwa uushona, ihe ngele hasho, natango otatu shuna moshipotha.

## NATU HANGANENI, NATU PEWE EVI KU S.A. OSHO AALUUDHE TAA INDILE

Kutha po tango iinima tayi eta uuwehame komalutu nomadhiladhilo mokati kaantu, nena oto kala u uvite elago, ombili naantu otaa ka simaneka uukwatya wawo.

Osho sha tumbulwa komukwaniilwa nomuleli gwoTango gwaTranskei, Kaiser Matanzima, sho a galuka kuAmerika.

Oministeli Matanzima okwa ti kutya, yo oya li ya taamba epangelo ndika lyokatongotongo ye shi aniwa otali ka tsakanitha omauvaneko galyo: ihe nani olye tu dhini owala.

Tse otwi igilila omathiminiko gepangelo ndika, ihe okuza kongashingeyi itatu ke shi idhidhimikila we sigo nuuyuni we shi tseyo.

Eipangelo lyaTranskei ndyoka tali holelwa aniwa kepangelo lyOwambo memanguluko, olya indila nale kEpangelo lya S.A. opo li gwedhelwe omikunda dhimwe natango dhi niwe ngashingeyi kaatiligane.

OmolwAakoosa etata lyomiliyona yimwe haa longo pondje yoshilongo, mboka pamadhiladhilo gepangelo ye na okushunithwa kevigumbo lyawo, otandi indile kutya omikunda ndhoka otu na oku dhi pewa, opo aantu yandje ya kale mo.

Aatiligane ye li miitopolwa tayi indilwa kEpangelo lyaTranskei, omukwaniilwa Matanzima ina dhiladhila nande ya tidhwe mo, ihe nayo wo ya konge uuthemba waavalelwa mo yaTranskei.

Omwaniilwa Matanzima ota indile wo evi lye li tulwe kumwe nolyaOos-London li kale muuthemba wepangelo lye.

### Tswana

"Egwano lyevi lyaantu yandje ngele ye na mpoka taa kala, shika osho nda tala kutya, ekota lyEpangelo lyokatongotongo okugwanithila aantu shono taye shi pula." Shika osha popiwa kuLucas Mangope, oministeli yotango yaAatswana.

Elenga enene Mangope olya popitha osikola yokombanda yaKapa lya ti: Egwedhelo lyevi ndyoka tu na okupewa ando paveta yomimvo 1913, 1936 olya shunduka; eshona noshilongo tashi manguluka.

Onke twa pumbwa natango evi opo tu tunge wo oshilandopangelo shetu shoka tashi tungwa pamutungilo ngoka twa hala.

### Kwa-Zulu

Ehupitho lyetu aaluudhe oli li ashike mokuhangana, ngele hasho, katu na we onakuyiwa yi shi okwiinelwa momatopagulo guulongogona waaluudhe mbuka tatu ningilwa.

Oshipopiwa shika osha zi mokana kelenga enene Gatsha Buthelezi, omukuluntu gwEpangelo lyAakwa-Zulu (Nale yi ithanwa Aazulu).

Moshigongi oshinene popepi naGermiston, moka naaluudhe oyendji kwa li ya gongala nawa, omuleli Buthelezi okwa ti:

Tu taleni oshiholelwa oshiwana shuukumwe waatiligane. Iho uvu nande elalakano lyokugamena omithigululwakalo dhOombulu, dhAaingilisa, dhAaputu meikalekelwo mu S.A Suid-Afrika ota lombwele uuyuni kutya, Aaluudhe ote ya pe uuthemba tau ya fala meipangelo, ihe konima oku na elalakano lyokushonopeka aawiliki aaluudhe kaa ninge amatokolo gawo.

Uunona uushona ohau nyanyukilwa uundami (egundji lyokanona kaali na omahini) tau tulwa momakana gawo, ihe ngele wa koko, ohaye u taasina po. Natse wo aaluudhe itatu ka idhidhimikila we omauvaneko gaa na sha. Osho oministeli Buthelezi a ti.



Ohamba Kaiser Matanzima waTranskei

### Nangutuuala

Eipangelo lyomavigumbo ngele oshinima shi shi okutaambwa, nena Owambo otayi ka indila egwedhelo lyiitopolwa ngashi, Tsumeb, Grootfontein nOtavi. Notatu ka pula wo Epangelo lya S.A. nolyaPutu opo ga kuthe po ondhilate ndjoka ya topola Owambo pokati kayo naAngola.

Omusamane Johannes Jefta Nangutuuala, ongomuwiliki gwongundu yoDemokratiese Kop, okwa gandja efatululo ndika kiifo sho a talele po Ovenduka nuumvo. Ihe omusamane Nangutuuala oku na ohokwe yokuhogololwa a kale oshilyo mEpangelo lyOwambo opo a vule okuhupitha aantu ye koshiponga shooveta dhomavigumbo.

### Itashi ningwa nando, Botha

"Ngele aawiliki yomavigumbo taa tsikile nokupula omagwedhelo gomavi giilongo yawo yene, otaa ki ipa uusama yo yene sho taa ka mona kutya, nani otashi tokelitha ashike okupewa emanguluko lyu udha notashi li etele nokuli omupya.

Shika osho sha yamukulwa koministeli yiinima yaaludhe nehumokomeho lyawo, omusamane M.C. Botha.

Kombinga yomadhiladhilo gaMatanzima kutya, aatiligane ya kale ye na uuthemba woshilongo momavigumbo, omusamane Botha ota ti shoka oshi na omalimbililo ngele otashi ziminwa nokaatiligane mboka taa indilwa moshinima shoka.

Ongaanguka te popi medhina lyAaingilisa omayovi, Epangelo olye tu yelithila nawa kutya, Oos-London otashi kala eha lyetu aa-

tiligane sigo aluhe. Tse inatu hala ishewe tashi luudhikwa kaaluudhe.

Osho Edgar Glass, a gandja omadhiladhilo ge. Nale okwa kala omukuluntu gwoshilando shoka. Aatiligane kaye na etegameno lyuwanawa washa mepangelo lyaaluudhe.

Matanzima shila ota ziminwa ashike kaatiligane aashona mboka kaa uuvite ko nando uukwaludhi shoka tau ti, osho gumwe Fred Stakemire, a gandja omadhiladhilo ge. Oye omukuluntu gwoshilando shaOos-London shoka tashi indilwa kuMatanzima.

### OPULANDA YOOMINA DHOMAVIGUMBO

Ehangano lyoomina dhaaluudhe olya dhikwa ngashingeyi nombelewa yalyo yimwe oya egululilwa iilonga yalyo mOvenduka omasiku ngaka, pashifonkundana shOombulu "Die Suidwester".

Elalakano lyehangano ndika okudhika nokukonakona iilonga yiikwamina nkene tayi monika momavigumbo gaSuidwes. Ombinga yimwe osho wo okuyambidhidha ependulopo lyomavigumbo ngaashi shi ipyakidhilwa nasho kEpangelo lya S.A.

Aatiligane ayehe ye na okulonga mekwatathano nehangano ndyoka otaa ziminwa kombelewa yomOvenduka, hakuKomufala we ngoka e na sha ando nevigumbo moka tamu longwa.

Ombelwa onene yehangano ndika oyi li kuPretoria.

### Swapo na pulakene wo kutse

"Otandi indile aakondjelimanguluko ayehe naapolisi yaSuid-Afrika opo ya hulithe po mbala omadhigagathano koongamba dhoshilongo shetu manga inaaga taandela nevi alihe," osho omusamane Johannes J. Nangutuuala a indila.

Mefatululo lye ndyoka e li gandja kiifo nokooradio, omusamane Nangutuuala okwa ti kutya, omadhigagathano koongamba dhNamibia kage shi ashike ekanitho lyoomwe-nyo dhaantu yetu, ihe ogo wo endhindhili-ko lyuupolitika kaa na omwenyo muka.

Oshipotha shaNamibia nashi ethelwe mii-kaha ya V.V.O. nEpangelo lya S.A., tse kombinga yetu tu koleke oongundu ndhoka mbali nuuyuki wetu nokulonga pashili, opo eyamukulo li monike mbala.

Omuwiliki gwongundu yaDemokratiese Kop, Nangutu ota ti, oSwapo otayi simanekwa ashike miilonga yayo mbyoka yi na sha nuwanawa waantu yaNamibia.

Tse mboka tu li meni lyevi, itatu nyanyukilwa nando omadhigagathano gopaugoya taga ningwa koongamba dhoshilongo. Aantu yetu kombanda yomafuta naye shi dhimbulukwe kutya, itaa vulu okuninga shaashoka, manga inaaya pula kutse.

Uuyuni ngele tau tokola iita, nena owo u na okulwitha S.A., hakulwitha aantu yaNamibia. Ombinzi yaantu yaKalunga ndjoka tayi tika koongamba iipundjamenye, otayi ka pulwa ongele aakondjelimanguluko nenge Epangelo lya S.A. Osho omusamane Nangutuuala a ti.

Sh. Th. Amulo, Tsumeb: Ota nyola ta ti: "Aagundjuka kokeni moonduge nome-tilokalunga. Pukululeni oshigwana sheni nombili, opo mu simanekithe edhina lyuugundjuka pamukalo omwaanawa. Oomboka haa inekele Omuwa noku mu longela, oyo taa ningi othithiya ihaayi pwine.

## Ehambelelo lepasha

### Ethimbo inali pya tu shi lundululeni?

Pethimbo lyonale sigo opethimbo ndika tu li, aahiywa yoshituthihango ohaa faalele iimbale nenge tu tye omagano kohango. Omuntu ngele okwa fala oshimbale she, oha tegelele moshimbale moka a tulilwe mo sha.

Omukalo nguka ogwa fa elandakanitho. Ope na eyooloko pokati komagano nokulanda. Okugandja omagano ngoye e to tegelele u galulilwe sha, omukalo nguka ogwa fa gwaa shi kulongithwa. Ethimbo inali pya ano tu lundululeni oshinima shika?

Okugandja omagano tu na euvoko lyomuule lyoshituthi kutya otashi ti ngiini, shika otashi pupalekele wo mwene gwoshituthi omalongekidho ge agehe.

Ombinga yimwe tayi sita ohoni oyo okwaasimaneka elongelokalunga lyoshituthi. Oshi na wo ondilo kombinga yomuhiywa ngele ta kala mongerki moshituthi, hakegumbo ashike. Ongerki onawa ngele tayi kala yu udha ndoo. Pamukalo nguka otatu simaneke iituthi yooyakwetu. Onawa aagundjuka tu iyagekeni linima kehe mbyoka yaa na ekwatho lyasha kombinga yiituthi yetu noyooyakwetu.

(Oonkundathana dha zi moshigongi shaailongi yomoosikola dhapombanda megongalo lya-Elim, paAktofel Uushona)



“Otwa ongaleni nena apa okuhambelela Kalunga eshi e tu pa ounona vavali oshita. Eshi osho efilonghenda laKalunga linene,” osho sha li sha udifwa mOfinde, omukunda umwe meongalo laKongo mOukwanyama.

Engafifi linene lovanhu okwa li la mboboloka keembinga adishe domukunda ou kwoongalela moshivilohambelelo shepasha. Omwa li omuudifi munene mokati kavo ependa omudiakoni mongerki yaAnglikani, Jacobus Nakwatumba womeongalo lavo laNdema. Okwa li a udifila yo oshivilo eshi.

“Ngaashi Ndamononghenda Nikodemus, wa twalele ounona voye kepata laJesus, eshi we va shashifa opo va ninge ovakwane-dimo laKristus, osho yo twa ngala nonena apa eshi wa eta ounona ava kumwene wepata lapanhu, Teofilus Mbwalu. Nde natu taleni kutya, ounona ava ova hoololwa va kale ovakwaKristus,” osho tate Jacobus a udifila eembunga moshivilo shinya.

### Omapulo a nyamukulwa

Epasha oshikwashikesho hano? Epulo eli ola pulwa moshivilo. Omwa li ovakulunhu lela. Epasha olo oshivilo shikulu shonale eshi sha li hashi danwa fiku kwa dalwa ounona vavali.

Ngeenge omunhu a eta eehamba, nena oha talwa nomesho manene, oku na vati oshidila shonhumba. Oha tungilwa ondujuwo yoitwali, oshimeyuwo, omo ha twalwa kondudu ei ya ifanwa i findike epasha eli. Omwali ou iha popi novanhu vamaumbo, shapo apa e li, onghuwilili ta denge, fiyo efiku olo ta pitifwa.

Epasha ohali findikwa efimbo lile li fike nande eehani hamano. Omwali ihe likosho osho yo ita vava, shapo ota kala ashike ngaho a fe oshihanangolo. Epasha ohali dindike ou we li lyata vati omaulu, onghee hamwali ashike ha teeleele ekosho, ndele kesho tuu ou a lyata epasha.

Fiku nee tali findikwa, ohapa kala oudano oufiku aushe fiyo ongula. Voo ovanhu tava i moshiyavo. Ondudu otai longo oshilonga shayo shokukosha. Ondudu ohai futwa ongo-be noilya ya yadwa poshini, walye nee kutya ounene woshini osho ou fike peni.

Ohapu fewa nee elambo lakula omo ovanhu hava koshelwa. Komulili welambo olo oko haku shakenifwa nondjeva oyo i li shimwe shomoifuta yondudu.

Epasha loo vene oshinima sha fimana, osheshi eehamba nomalenga okwa kendabala a dale ngeno omapasha, ndele ahowe. Epasha ohali pashula epata. Ngeenge ola dalwa kounona, nena elao lepata olo pamwe naina naxe. Ndelenee ngeenge ola dalwa kovakulunhu, nena itave li tekula.

Hano epasha kombinga imwe ola talwa oli na elao, nde kombinga ikwao oli na omupya.



Kombinga younona hava dalwa mepasha kakwa li hava dipawa po, osheshi ngeno katu na oshivilo eshi shekosho. Ovanyamukuli vepulo ova ti kutya, oshinima shedi-pao lounona va dalwa epasha, inave shi u-da nale.

### Omolwashike kwa ningwa oshivilo fiku linya

Oshivilohambelelo eshi shepasha, osha li po okuhambelela Kalunga molwouwa ou e tu ningila. Osho sha li efina loshivilo. Elalakanono ola li yo ngaashi omushamane Teofilus a popya ou naye yo va dalwa eehamba 1905 kutya:

“Tu tamekeni okukufa oivilo oipwe noidila, yo i uye mouyelele.” Okwa twikila ta ti: “Oshiwana nashi pungule nena oshivilo eshi, ndele ame onda hala okukwafa oonakudala ava noku va hafifa nokuva pa oupe-wa vanini ovo ndi kwete.”

Osho ngaha omushamane Teofilus a kumaida ovanhu va tale nonghenda oonakudala ounona vavali, opo va dule okulikwafa mokuumbilwa ongalo.

Shito oyoongelwa moivilo ei ohai pewa ondudu, manga ounona naina tava fyaala po hautuka. Fiku linya ashishesha osho sha monika po osha fiilwa eumbo loonakudala eehamba.

Sha hokololwa komuhongwafita, P. Heita

### OOLYE ANO YE NA OKUNINGA AANANGESHEFA?

Aantu mboka ye na okuhumbata oshimpwiyu shuunangeshefa oolye ano? Aasitagongalo, aadiakoni, aakwaniilwa nooyene yomikunda nenge aalongisikola?

Aantu mboka kaaye na iilonga yilwe moshigwana pamwe oyo ye na okwiinekelelwa oshimpwiyu shika, oshoka aasitagongalo naayevangeliste nenge aadiakoni oomestela aantu mboka oye na nale iilonga yokuhunga oomwenyo dhaantu. Oyo aalangeli yegumbo lyaKalunga.

Epulo oli li mpoka omolwamboka haa thikama aluhe momutete gwaanangeshefa, opo ya kongele oositola dhawo osuuka mOholosaila, kutya iilonga yomagongalo ohayi longwa etango peni? Iilonga yetu oyokugongela iimaliwa nenge aantu yaKalunga?

Itandi popi shika ongomunyenyeteli, ihe oku mu dhimbulukitha ashike.

Omudiakoni Abisai Iihuhwa

### OMUKWETU

Oshifo shOngerki onkwaevangeli paLuther yomOwambokavango  
Die Nuusblad van die Evangeliese Lutherse Owambokavangokerk  
Ohashi nyanyangidhwa mOniipa, Omukuluntu gwoshifo/Hoofredakteur omumbisofi Dr. Leonard Auala, Amushanga/redakteur Rev. Sebulon Ekandjo  
Ondando yoshifo komumvo muSuidwes-Afrika R1.00, kombanda yomafuta R2.00  
Ondando nomambestelo naga tumwe kOmulkwetu, Oniipa, P/B 2013, Ondangwa, S.W.A.

Omatseyitho gomuntu mwene pashinyolwa shuule woondeimi 1 otashi futwa R1.00  
oondeimi 2 otashi futwa R1.90  
oondeimi 3 otashi futwa R2.70  
oondeimi 4 otashi futwa R3.40  
oondeimi 5 otashi futwa R5.00  
Oto vulu okutuma wo efano lyaashono wa hala shi tseyithwe.

Owambokavango Church Press  
P/B 2013 Ondangwa, S. W. A.